



COIMISIÚN UM
ATHCHÓIRIÚ AN DLÍ
LAW REFORM
COMMISSION

LEABHRÁN FAISNÉISE D'IARRTHÓIRÍ LÉIGH GO CÚRAMACH

Comórtas oscailte le haghaidh ceapadh chuig an bpost seo:

**POST SEALADACH MAR BHAINISTEOR TIONSCADAIL (AN CLÁR UM ATHCHÓIRIÚ AN DLÍ
REACTÚIL) SA CHOIMISIÚN UM ATHCHÓIRIÚ AN DLÍ (CONRADH 3 BLIANA)**

Dáta deiridh: meán lae an 9 Feabhra 2026

Tá an Coimisiún um Athchóiriú an Dlí tiomanta do bheartas comhdheise a leanúint.

Reáchtálfaidh an Coimisiún um Athchóiriú an Dlí an feachtas seo de réir an Chóid Chleachtais i gcomhair Ceapacháin chun Post sa Státseirbhís agus sa tSeirbhís Phoiblí arna ullmhú ag an gCoimisiún um Cheapacháin Seirbhíse Poiblí.

Foilsíonn an Coimisiún um Cheapacháin Seirbhíse Poiblí cóid chleachtais agus bíonn siad ar fáil ar www.cpsa.ie

RÍOMHPHOST recruitment@lawreform.ie

SUÍOMH GRÉASÁIN www.lawreform.ie

TEILEAFÓN 01 6377609

POST SEALADACH MAR BHAINISTEOR TIONSCADAIL (AN CLÁR UM ATHCHÓIRIÚ AN DLÍ REACTÚIL) SA CHOIMISIÚN UM ATHCHÓIRIÚ AN DLÍ (CONRADH 3 BLIANA)

Faisnéis Chúlra faoin bpost

Comhlacht reachtúil a bunaíodh leis an *Acht fán gCoimisiún um Athchóiriú an Dlí, 1975*, is ea an Coimisiún um Athchóiriú an Dlí (an Coimisiún). Tá cúigear comhaltaí ag an gCoimisiún: an tUachtarán, Coimisinéir lánaimseartha, agus triúr Coimisinéirí páirtaimseartha. Is é an ról atá aige an dlí a choinneáil faoi athbhreithniú neamhspleách, oibiachtúil agus saineolach, moltaí iarmhartacha a dhéanamh le haghaidh athchóiriú an dlí, agus an dlí reatha a dhéanamh inrochtana do gach duine.

Faigheann na Coimisinéirí tacaíocht ó fhoireann an Choimisiúin, a chuimsíonn an Stiúrthóir Taighde, an Bainisteoir um Rochtain ar Reachtaíocht, an Ceann Riaracháin, beirt Leas-Stiúrthóirí Taighde, beirt Leas-Bhainisteoirí um Rochtain ar Reachtaíocht, an Bainisteoir Faisnéise Dlí, ochtar taighdeoirí dlí, agus cúigear ball foirne riaracháin.

Tá sé beartaithe ag an gCoimisiún:

- an Clár um Athchóiriú an Dlí Reachtúil a bhaineann le hábhair thánaisteacha reachtúla réamh-1922 agus ábhair ghaolmhara a chur i gcrích sa bhliain 2026;
- an Clár um Athchóiriú an Dlí Reachtúil a bhaineann le reachtaíocht thánaisteach a rinneadh ón mbliain 1922 go dtí an bhliain 1950 a chur i gcrích, arb obair í a thosóidh sa bhliain 2026.

Cuireadh an chuid is mó den obair faoin gClár um Athchóiriú an Dlí Reachtúil réamh-1922 i gcrích cheana féin, go háirithe trí na hAchtanna uile réamh-1922 atá as feidhm a aisghairm agus gan ach na hAchtanna sin atá ábhartha go fóill a choinneáil i bhfeidhm. Áiríodh leis an obair sin freisin formhór na gcatagóirí éagsúla d'ionstraimí reachtúla réamh-1922 a rinneadh suas go dtí an bhliain 1860 a chúlghairm agus taighde a dhéanamh ar son Bille le haghaidh formhór na n-ionstraimí a rinneadh ón mbliain 1861 go dtí an bhliain 1921 a chúlghairm. Is é atá le déanamh go fóill ná tabhairt faoin gcéim dheiridh de thaighde, measúnú agus catagóiriú a dhéanamh ar ionstraimí a rinneadh ón mbliain 1861 go dtí an bhliain 1921 lena n-aisghairm nó lena gcoinneáil, sula ndrúachtófar aon Bille.

Nuair a bheidh an chéim sin den Chlár um Athchóiriú an Dlí Reachtúil curtha i gcrích, beidh ag an Stát liosta iomlán den reachtaíocht ar fad – idir reachtaíocht phríomha agus reachtaíocht thánaisteach – atá i bhfeidhm in Éirinn. Maidir leis an reachtaíocht ar fad a shainaithneofar sna céimeanna atá fágtha den Chlár um Athchóiriú an Dlí Reachtúil a bheith oiriúnach dá coinneáil i bhfeidhm, is é cleachtas an Choimisiúin go ndéanfar í a dhigitiú agus a chur ar fáil do Ríomhleabhar Reachtanna na hÉireann. Treisíonn foilsiú na reachtaíochta lena mbaineann an stádas atá ag an Ríomhleabhar Reachtanna mar phríomhstór reachtaíochta ar líne sa Stát.

Is é an rud atá beartaithe don chéad chéim eile ná an reachtaíocht thánaisteach a rinneadh ón mbliain 1922 go dtí an bhliain 1950 a scrúdú d'fhonn sainaithint a dhéanamh ar ionstraimí tánaisteacha atá caite nó as feidhm agus a fhéadfar a chúlghairm. Ar an tslí sin, cuirfear an obair ar an reachtaíocht a rinneadh ón mbliain 1922 go dtí an bhliain 1950 i gcrích, rud a baineadh amach go páirteach cheana féin trí 301 cheann d'Achtanna a rinneadh sa tréimhse

sin agus atá iomarcach agus as feidhm a aisghairm leis an Acht um Athchóiriú an Dlí Reachtúil, 2016.

Feidhm an Phoist

Tá Bainisteoir Tionscadail á earcú ag an gCoimisiún chun formhaoirseacht a dhéanamh ar an obair atá ar bun chun athbhreithniú a dhéanamh ar na hábhair thánaisteacha reachtúla agus na hábhair ghaolmhara uile a rinneadh ón mbliain 1861 go dtí an bhliain 1922 agus a raibh feidhm acu maidir le hÉirinn, agus chun an obair sin a chur i gcrích, d'fhonea a shuí cén ceann de na hionstraimí sin atá ábhartha go fóill agus ar cheart iad a choinneáil i bhfeidhm. Is é an toradh a bheidh ar an gcéad chéim den obair ná Scéimeanna/Ceannteidil a ullmhú do *Bhille um Athchóiriú an Dlí Reachtúil*. Déanfaidh an Bainisteoir Tionscadail scrúdú ar an reachtaíocht thánaisteach ar fad a rinneadh ón mbliain 1922 go dtí an bhliain 1950 freisin, agus beidh na cuspóirí céanna leis an obair sin.

I gcomparáid leis an obair a rinneadh ar an tréimhse 1861-1921, ba cheart go mbeadh sé níos éasca reachtaíocht thánaisteach a rinneadh ón mbliain 1921 i leith a fhoinsiú. Mar sin féin, níl na hionstraimí uile a rinneadh sa tréimhse sin ar fáil ar Ríomhleabhar Reachtanna na hÉireann. Réamhghné den tionscadal, mar sin, a bheidh sna hionstraimí atá ar iarraidh ó leabharlanna agus ó stórtha a fhoinsiú.

Tá an Coimisiún ag súil leis go mbeidh feidhm ag an modheolaíocht láithreach go fóill. Áirítear leis sin:

- dul i gcomhairle leathan le Ranna Rialtais, leis an bpobal agus le páirtithe leasmhara eile;
- leanúint le samhail Grúpa Oibre/Stiúrtha a úsáid, mar a úsáideadh cheana féin faoin gClár um Athchóiriú an Dlí Reachtúil;
- Scéim/Ceannteidil a ullmhú do Bhille um Athchóiriú an Dlí Reachtúil (1861 go 1922) agus do Bhille um Athchóiriú an Dlí Reachtúil (1922 go 1950);
- sceideal “Liosta Bháin” den ábhar reachtúil atá á choinneáil i bhfeidhm agus sceideal ar leith den ábhar cúlghairthe reachtúil araon a chur ar áireamh sna Scéimeanna Bille/Ceannteidil Bhille uile; agus
- gearrtheideal nó lua a chur le gach ábhar coinnithe reachtúil nach bhfuil gearrtheideal nó lua aige cheana féin.

Beidh an-phointeáilteacht i gceist leis an obair. Sannfar beirt taighdeoirí dlí don Bhainisteoir Tionscadail. Beidh sé nó sí freagrach as an bhfoireann a bhainistiú chun a chinntiú go gcomhlíonfar cuspóirí agus spriocanna sonraithe agus as Scéim/Ceannteidil a ullmhú do Bhillí um Athchóiriú an Dlí Reachtúil. Tuairisceoidh sé nó sí don Choimisinéir lánaimseartha agus don Bhainisteoir um Rochtain ar Reachtaíocht.

Príomhfhreagrachtaí

- Na rialacha agus na hionstraimí tánaisteacha reachtúla uile a bhfuil feidhm acu in Éirinn a fhoinsiú agus a scrúdú, d'fhonea a shuí cé na hionstraimí atá ábhartha go fóill agus ar cheart iad a choinneáil i bhfeidhm;

- An saineolas riachtanach TF a shocrú i leith na modheolaíochta agus i leith na córais agus na bunachair sonraí leictreonacha ábhartha a chomhlánú de réir an chaighdeán cruinnis is gá;
- Caidreamh éifeachtach a dhéanamh le Ranna Rialtais agus le daoine eile, mar atá tuairiscithe thuas, chun próiseas comhairliúcháin rathúil a chinntiú;
- Scéim/Ceannteidil a dhréachtú don Bhille um Athchóiriú an Dlí Reachtúil is gá;
- Oiliúint a chur ar an mbeirt taighdeoirí dlí shannta sna córais ábhartha TF a úsáid, bainistiú a dhéanamh orthu, faireachán a dhéanamh ar a gcuid oibre agus a chinntiú go gcuirfidh siad an obair sin i gcrích de réir ardchaighdeán, agus aghaidh a thabhairt ar aon saincheisteanna feidhmíochta a thagann chun cinn;
- Cumas daoine eile a fhorbairt trí aiseolas, trí oiliúint agus trí dheiseanna a chruthú le haghaidh forbairt scileanna;
- Faireachán, tomhas agus tuairisciú a dhéanamh ar an dul chun cinn ar an gClár ag eatraimh a chomhaontófar leis an gCoimisinéir lánaimseartha agus leis an mBainisteoir um Rochtain ar Reachtaíocht;
- Tabhairt faoi aon dualgais eile a shannfaidh an Coimisiún agus a bheidh ag teastáil ó am go chéile.

Cáilíochtaí agus Taithí

Ceanglais Bhunriachtanacha

Ní mór d'iarrthóirí na nithe seo a leanas a bheith acu an 1 Eanáir 2026 nó roimh an dáta sin:

(a) céim onóracha nó cáilíocht choibhéiseach (ag Leibhéal 8 ar a laghad ar an gCreat Náisiúnta Cáilíochtaí) sa Dlí, nó cáilíocht, atá inghlactha ag an gCoimisiún um Athchóiriú an Dlí mar cháilíocht choibhéiseach, inar tógadh an Dlí mar mhórábhar, nó cáilíochtaí coibhéiseacha agus/nó taithí choibhéiseach (mar shampla, mar leabharlannaí nó staraí dlí);

(b) taithí bhainistíochta tionscadail ar thionscadal ábhartha a bhainistiú go rathúil laistigh de na 3 bliana seo a chuaigh thart.

Ina theannta sin, ní mór d'iarrthóirí na nithe seo a leanas a bheith acu agus a bheith in ann iad a léiriú:

- eolas domhain ar Ríomhleabhar Reachtanna na hÉireann agus taithí ar an Ríomhleabhar a úsáid;
- tuiscint agus eolas ar stair Athbhreithniú an Dlí Reachtúil in Éirinn;
- tuiscint ar an dóigh a gcomhlánaíonn obair an Chláir um Athchóiriú an Dlí Reachtúil ríomh-Rialtas, an Smacht Reachta agus obair reatha an Choimisiúin ar Rochtain ar Reachtaíocht, agus tuiscint ar a riachtanaí atá sé reachtaíocht atá cruinn agus cothrom le dáta a sholáthar ar líne don phobal;
- scileanna láidre TF agus taithí ar chlár dhifriúla TF a úsáid;
- an-phointeáilteacht i leith ábhar reachtúil a lua;

- cumas chun cúraimí a phleanáil agus a chur in ord tosaíochta, agus chun faireachán a dhéanamh orthu, ar bhealach córasach eagraithe ar mhaithe le haschuir shonraithe a sholáthar laistigh d'amlínte riachtanacha agus de réir ardchaighdeán cáilíochta agus cruinnis;
- cumas chun daoine a bhainistiú agus chun daoine eile a stiúradh chun gur féidir leo a gcumas a fhorbairt agus a bhfeidhmíocht a uasmhéadú;
- cumas chun caidreamh éifeachtach a dhéanamh le daoine laistigh den Choimisiún agus lasmuigh de araon chun a chinntiú go mbainfear próiseas comhairliúcháin rathúil amach;
- cumas chun rannchuidiú le straitéis agus beartas an Chláir um Athchóiriú an Dlí Reachtúil a fhorbairt sa todhchaí;
- cumas chun faisnéis a chur i láthair ar bhealach muiníneach, loighciúil agus éifeachtach;
- dea-scileanna idirphearsanta do thimpeallacht oibre.

Príomhthréithe chun feidhmiú go héifeachtach mar Bhainisteoir Tionscadail ar an gClár um Athchóiriú an Dlí Reachtúil

Tarraingítear aird na n-iarrthóirí ar na príomhinniúlachtaí a bhaineann leis an bpost seo:

- ceannaireacht foirne, lena n-áirítear taithí bhainistíochta tionscadail;
- saineolas agus taithí ar fhéinfhorbairt:
 - eolas agus taithí ar Ríomhleabhar Reachtanna na hÉireann,
 - eolas ar Athchóiriú an Dlí Reachtúil,
 - eolas ar Rochtain ar Reachtaíocht;
- eolas agus taithí ábhartha ar TFC;
- bainistíocht agus soláthar torthaí;
- breithiúnas, anailís agus cinnteoireacht

Incháilitheacht chun páirt a ghlacadh sa chomórtas agus srianta áirithe ar incháilitheacht

Ceanglais Saoránachta

Ní mór d'iarrthóirí Incháilithe:

- (a) A bheith ina saoránach de chuid an Limistéir Eorpaigh Eacnamaíoch (LEE). Is é atá in LEE Ballstáit an Aontais Eorpaigh mar aon leis an Íoslainn, Lichtinstéin agus an Iorua; nó
- (b) A bheith ina saoránach de chuid na Ríochta Aontaithe; nó
- (c) A bheith ina saoránach de chuid na hEilvéise de bhun an chomhaontaithe idir an tAontas Eorpach agus an Eilvéis maidir leis an tsaorghluaiseacht daoine; nó
- (d) A bheith ina saoránach de chuid tír nach tír LEE í agus a bhfuil cead Stampa 4¹ nó cead Stampa 5 acu.

¹ Tabhair faoi deara go nglactar le cead Airteagal 50 CAE, a tháinig in ionad Stampa 4 EUFAM tar éis an Bhreathimeachta, mar choibhéis le Stampa 4.

Chun cáiliú, ní mór d'iarrthóirí ceann ar bith de na critéir shaoránachta thuas a chomhlíonadh faoi dháta aon tairisceana poist.

Comhaontú Comhchoiteann: Íocaíochtaí Iomarcaíochta le Seirbhísigh Phoiblí

Rinneadh Comhaontú Comhchoiteann, ar thángthas air idir an Roinn Caiteachais Phoiblí agus Athchóirithe agus Coiste Seirbhísí Poiblí Chomhdháil na gCeardchumann (ICTU) i ndáil le hÍocaíochtaí Iomarcaíochta ex-gratia le Seirbhísigh Phoiblí, agus a bhfuil éifeacht leis ón 1 Meitheamh 2012, a thabhairt isteach leis an litir ón Roinn Caiteachais Phoiblí agus Athchóirithe chuig Oifigigh Phearsanra dar dáta an 28 Meitheamh 2012. Is coinníoll de chuid an Chomhaontaithe Chomhchoitinn é nach mbeidh daoine a bhaineann leas as an gcomhaontú incháilithe lena n-athfhostú sa tSeirbhís Phoiblí ag aon chomhlacht Seirbhíse Poiblí (mar a mhínítear é sna hAchtanna um Bearta Airgeadais Éigeandála ar Mhaithe le Leas an Phobail, 2009 – 2011) go ceann tréimhse 2 bhliain tar éis an fhostaíocht a fhoirceannadh. Beidh ar dhaoine a bhain leas as an scéim sin agus a n-éireoidh leo sa chomórtas seo a chruthú go bhfuil siad incháilithe (deireadh a bheith leis an tréimhse neamh-incháilitheachta).

An Scéim Dreasachta Luathscoir (SDLS):

Is coinníoll é de chuid na Scéime Dreasachta Luathscoir (SDLS), mar a leagtar amach í i gCiorclán 12/09 ón Roinn Airgeadais, nach bhfuil daoine a scoir incháilithe faoin Scéim sin le haghaidh cur isteach ar phost eile san fhostaíocht chéanna nó san earnáil chéanna. Ní ceadmhach, mar sin, do dhaoine a scoir faoin scéim sin cur isteach ar an bpost seo.

Ciorclán ón Roinn Sláinte agus Leanaí (7/2010):

Tugadh isteach Scéim Luathscoir Shaorálaigh Spriocdhírithe (LSS) agus Scéimeanna Iomarcaíochta Saorálaí (SIS) le Ciorclán 7/2010 ón Roinn Sláinte dar dáta an 1 Samhain 2010. Is coinníoll de chuid scéim LSS é nach mbeidh daoine a bhaineann leas as an scéim incháilithe lena n-athfhostú san earnáil sláinte poiblí ná sa tSeirbhís Phoiblí i gcoitinne ná i gcomhlacht a mhaoineítear go hiomlán nó go formhór as airgead poiblí. Tá feidhm ag an toirmeasc céanna ar athfhostú faoi SIS, ach amháin gur toirmeasc go ceann tréimhse 7 mbliana é an toirmeasc. Níl daoine a bhain leas as scéim LSS incháilithe le páirt a ghlacadh sa chomórtas seo. Beidh ar dhaoine a bhain leas as scéim SIS agus a n-éireoidh leo sa chomórtas seo a chruthú go bhfuil siad incháilithe (deireadh a bheith leis an tréimhse neamh-incháilitheachta).

An Roinn Comhshaoil, Pobail agus Rialtais Áitiúil (Ciorclán LG(P) 06/2013)

Tugadh Scéim Iomarcaíochta Saorálaí d'Údaráis Áitiúla isteach le Ciorclán LG(P) 06/2013 ón Roinn Comhshaoil, Pobail agus Rialtais Áitiúil. De réir théarmaí an *Chomhaontaithe Chomhchoitinn: Íocaíochtaí Iomarcaíochta le Seirbhísigh Phoiblí* dar dáta an 28 Meitheamh 2012 mar atá sonraithe thuas, is coinníoll sonrach de chuid na Scéime Luathscoir Shaorálaigh nach mbeidh daoine incháilithe lena n-athfhostú in aon chomhlacht Seirbhíse Poiblí [de réir an tsainmhínithe sna hAchtanna um Bearta Airgeadais Éigeandála ar Mhaithe le Leas an Phobail, 2009-2011, agus san Acht um Pinsin na Seirbhíse Poiblí (Scéim Aonair agus Forálacha Eile), 2012] go ceann tréimhse 2 bhliain tar éis a ndáta imeachta faoin Scéim seo. Tá feidhm ag na

coinníollacha seo freisin i gcás fostaíochta ar bhonn conradh le haghaidh seirbhíse (mar chonraitheoir nó mar fhostaí de chuid conraitheora).

Dearbhú:

Ceanglófar ar iarratasóirí a dhearbhu ar bhain siad leas as scéim dreasachta luathscoir Seirbhíse Poiblí. Ceanglófar freisin ar iarratasóirí aon teidil chun sochair phinsin Seirbhíse Poiblí (atá á íoc nó atá caomhnaithe) ó aon fhostaíocht Seirbhíse Poiblí eile a dhearbhu agus/nó é a dhearbhu i gcás go bhfuair siad íocaíocht ionaid i leith seirbhís in aon fhostaíochta Seirbhíse Poiblí.

Fostóir Roghnaithe

Mar **Fhostóir Roghnaithe**, tá ag an Státseirbhís a lán beartas le haghaidh obair sholúbtha agus obair a thacaíonn le teaghlaigh, e.g., Comhroinnt Oibre, Bliain Oibre Níos Giorra agus Cianobair (a oibrítear ar bhonn ‘cumaisc’), etc. Maidir le gach beartas roghnach, féadfar iarratas a dhéanamh orthu de réir na bhforálacha reachtúla iomchuí agus tá siad faoi réir riachtanais ghnó na heagraíochta.

Príomhchoinníollacha Seirbhíse

Ginearálta

Tá an ceapachán chuig post sealadach sa Státseirbhís agus tá sé faoi réir Achtanna Rialuithe na Stát-Seirbhíse, 1956 go 2005, an Achta um Bainistíocht Seirbhíse Poiblí (Earcaíocht agus Ceapacháin) 2004 agus aon Achta eile atá i bhfeidhm idir an dá linn sa Státseirbhís.

Pá

Is é seo a leanas an scála tuarastail don phost (tá na rátaí in éifeacht ón 1 Lúnasa 2025 i leith):

Scála Tuarastail Ranníocaíochta Pearsanta Pinsin (RPP) an Ardoifigh Feidhmiúcháin ón 1 Lúnasa 2025,

€58,847 – €60,567 – €62,285

Tá feidhm ag an ráta pá RPP i gcás go gceanglaítear ar an duine aonair Ranníocaíocht Phearsanta Pinsin (dá ngairtear ranníocaíocht príomhscéime ar shlí eile) a íoc de réir rialacha a p(h)ríomhscéime aoisliúntais/a scéime pearsanta aoisliúntais. Tá sé sin difriúil le ranníocaíocht i ndáil le comhaltas i scéim Céilí agus Leanaí agus tá sé difriúil freisin leis na Ranníocaíochtaí Breise Aoisliúntais.

Beidh feidhm ag ráta difriúil i gcás nach gceanglaítear ar an gceapaí Ranníocaíocht Phearsanta Pinsin a dhéanamh.

Nóta Tábhachtach

Is ag bun an scála a thosófar agus ní bheidh an ráta luach saothair faoi réir idirbheartaíochta agus féadfar é a choigeartú ó am go ham de réir bheartas pá an Rialtais.

Féadfar go mbeidh téarmaí agus coinníollacha difriúla i bhfeidhm i gcás gur seirbhíseach poiblí san am i láthair atá sa cheapaí.

Féadfar breisíochtaí a íoc faoi réir feidhmíocht shásúil de réir Beartas reatha Rialtais.

Déanfar íocaíocht gach coicís i riaráiste trí Ríomhaistriú Airgid (RAA) isteach i gcuntas bainc a roghnaíonn tú. Ní féidir íocaíocht a dhéanamh go dtí go bhfuil uimhir chuntais bainc agus cód sórtála bainc tugtha ar an gceapadh, agus déanfar asbhaintí reachtúla ón tuarastal de réir mar is cuí.

Comhaontóidh tú go n-aisíocfaidh tú aon ró-íocaíocht tuarastail, liúntas nó speansas de réir Chiorclán 07/2018: Aisghabháil Ró-Íocaíochtaí Tuarastail, Liúntas agus Speansas a rinneadh le Baill Foirne/Iar-Bhaill Foirne/Pinsinéirí

1. Tionacht agus Promhadh

Gheobhaidh an ceapaí conradh sealadach téarma shocraithe a mhairfidh suas le 3 bliana ó dháta an cheapacháin. Ceanglófar ar an iarrthóir rathúil tréimhse phromhaidh 6 mhí a chur isteach.

Féadfaidh ceachtar taobh an cheapachán a fhoirceannadh tráth ar bith de réir na nAchtanna um Fhógra Íosta agus Téarmaí Fostaíochta, 1973 go 2005. I gcás mí-iompar tromchúiseach, féadfar an fhostaíocht a fhoirceannadh tráth ar bith gan aon fhógra agus gan aon phionós.

Is ceapachán sealadach é an ceapachán, agus ní ghabhann leis aon teidlíocht chun stádas buan a fháil (trí chomórtas teoranta nó ar shlí eile).

2. Ceanncheathrú

Beidh an t-iarrthóir rathúil ag obair in oifigí an Choimisiúin, atá lonnaithe faoi láthair i dTeach Styne, Sráid Haiste, Baile Átha Cliath 2, nó a bheidh lonnaithe in áit eile amach anseo dá mbogfadh an Coimisiún chuig oifigí nua. Nuair a bhíonn an t-iarrthóir rathúil ar dhualgas agus as láthair ón mbaile agus ó oifigí an Choimisiúin dá bharr, íocfar speansais chuí taistil agus chothaithe leis/léi, faoi réir ghnáthrialacháin na státseirbhíse.

3. Scor/Aoisliúntas

Déanfar na téarmaí agus na coinníollacha aoisliúntais cuí atá i réim sa Státseirbhís a thairiscint don iarrthóir rathúil an tráth a thairgfear ceapachán. Go ginearálta, is bunaithe ar chomhaltas sa Scéim Pinsean Seirbhíse Poiblí Aonair (“an Scéim Aonair”) a thairgfear ceapachán do cheapaí nár oibrigh sa tSeirbhís Phoiblí riamh. Tá mionsonraí iomlána faoin Scéim ar fáil ag www.singlepensionscheme.gov.ie.

I gcás gur oibrigh an ceapaí i bpost inphinsin sa tseirbhís phoiblí (téarmaí nach mbaineann leis an Scéim Aonair) sna 26 seachtaine sular ceapadh é/í nó go bhfuil sé/sí ar shos gairme nó ar shaoire speisialta le pá/gan phá, is féidir go mbeidh téarmaí difriúla i bhfeidhm. Déanfar teidlíocht pinsin na gceapaithe sin amach maidir lena stair fostaíochta sa tseirbhís phoiblí.

Is mar seo a leanas atá na príomhfhórlacha atá i bhfeidhm maidir le comhaltas den Scéim Aonair:

- Aois Inphinsin: Is ionann an aois íosta ar a dtagann an pinsean chun bheith iníoctha agus an aois incháilitheachta le haghaidh an Phinsin Stáit, arb í 66 bliana d’aois í faoi láthair.

- Aois Scoir: Ní mór do bhaill sa scéim dul ar scor ar 70 bliain d'aois a shlánú.
- Baintear úsáid as meántuilleamh gairme chun sochair a ríomh (fabhraítear suim phinsin agus cnapshuim gach bliain agus uasráitítear iad gach bliain faoi threoir an phraghasinnéacs tomhaltóirí).
- Tá baint leis an bpraghasinnéacs tomhaltóirí ag méaduithe pinsin iarscoir.

Laghdú Pinsin

- Más rud é go raibh an ceapaí fostaithe cheana féin sa Státseirbhís nó sa tSeirbhís Phoiblí agus go bhfaigheann sé/sí pinsean ón Státseirbhís nó ón tSeirbhís Phoiblí, nó más rud é go bhfuil pinsean Státseirbhíse/Seirbhíse Poiblí á íoc le linn a (h)athfhostaíochta, **beidh an pinsean sin faoi réir laghdú de réir alt 52 den Acht um Pinsin na Seirbhíse Poiblí (Scéim Aonair agus Forálacha Eile), 2012. Tabhair faoi Deara: Nuair a dhéanann tú iarratas ar an bpost seo, tá tú ag admháil go dtuigeann tú go mbeidh feidhm ag na forálacha laghdúcháin, nuair is ábhartha. Níl sé beartaithe go dtacóidh an Roinn/Oifig is fostóir le hiarratas ar tharscaoileadh laghdúcháin i dtaca le ceapacháin chun an phoist seo.**
- Mar sin féin, más rud é go raibh an ceapaí fostaithe roimhe seo sa Státseirbhís nó sa tSeirbhís Phoiblí agus gur bronnadh pinsean air/uirthi faoi shocruithe luathscoir shaorálaigh (seachas an Scéim Dreasachta Luathscoir (SDLS), Ciorclán 7/2010 ón Roinn Sláinte maidir le LSS/SIS nó Ciorclán LG(P) 06/2013 ón Roinn Comhshaoil, Pobail agus Rialtais Áitiúil, a bhfágann ceann ar bith díobh nach bhfuil duine incháilithe le haghaidh an chomórtais), scoirfidh teideal chun an phinsin sin le héifeacht ó dháta an athcheapacháin. Is féidir, áfach, go ndéanfar socruithe speisialta chun seirbhís roimhe sin de chuid an cheapaí a ríomh chun críocha aon aoisliúntais a mbeidh an ceapaí i dteideal é a fháil sa todhchaí.
- **Scéim Luathscoir do Mhúinteoirí: An Roinn Oideachais agus Scileanna – Ciorclán 102/2007**
 Rinne an Roinn Oideachais agus Scileanna Scéim Luathscoir do Mhúinteoirí a thabhairt isteach. Tá sé mar choinníoll de chuid na Scéime Luathscoir gurb amhlaidh, seachas sna cásanna a leagtar amach i míreanna 10.2 agus 10.3 den doiciméadacht ciorcláin iomchuí agus sna cásanna sin amháin, más rud é go nglacann múinteoir le luathscor faoi Shraitheanna 1, 2 nó 3 den scéim sin agus go bhfostaítear é/í in aon cháil i réimse ar bith san earnáil phoiblí, a scoirfear láithreach de phinsean a íoc leis an duine sin faoin scéim. Tosófar arís ar íocaíochtaí pinsin, áfach, nuair a scoirfear den fhostaíocht sin nó ar an lá a shlánóidh an duine 60 bliain d'aois, cibé acu is déanaí, ach nuair a thosófar ar íocaíochtaí pinsin arís, beidh an pinsean bunaithe ar sheirbhís ináirithe iarbhir an duine mar mhúinteoir (i.e., ní chuirfear san áireamh na blianta breise a tugadh roimhe sin nuair a bheidh an íocaíocht pinsin á ríomh).

- **Scor de dheasca Easláinte**

Tabhair faoi deara gurb amhlaidh, maidir le haon daoine a chuaigh ar scor roimhe sin ar fhorais easláinte faoi théarmaí aon scéime aoisliúntais, a éilítear orthu a dhearbhu don eagraíocht atá ag riar an chomórtais earcaíochta, ag an gcéim iarratais tosaigh, cé acu atá nó nach bhfuil siad ag fáil pinsean den sórt sin.

Éileofar ar iarratasóirí freastal ar oifig an Phríomh-Dhochtúra Oifigiúil chun go measúnófar a gcumas chun seirbhís thráthrialta éifeachtach a sholáthar, agus an riocht a cháiligh iad le haghaidh scor de dheasca easláinte á chur san áireamh.

Ceapachán tar éis scor den Státseirbhís de dheasca easláinte

Má éiríonn leis/léi ina (h)iarratas tríd an gcomórtas, ba cheart don iarratasóir a bheith ar an eolas faoi na nithe seo a leanas:

1. Más rud é go meastar é/í a bheith oiriúnach do sheirbhís rialta éifeachtach a sholáthar agus go sanntar é/í do phost, scoirfear dá p(h)insean státseirbhíse de dheasca easláinte a íoc.
2. Má theipeann ar an iarratasóir an promhadh a chur i gcrích ina dhiaidh sin nó má chinneann sé/sí éirí as a p(h)ost sannta, ní fhéadfar é/í a fhilleadh ar stádas scoir ón státseirbhís de dheasca easláinte ná an pinsean státseirbhíse de dheasca easláinte a bhí ann roimh an iarratas a athbhunú, agus ní bheidh sé/sí ina theidil sin ach oiread.
3. Tiocfaidh an t-iarratasóir chun bheith ina b(h)all den Scéim Pinsean Seirbhíse Poiblí Aonair ar a c(h)eapadh má bhí sos is mó ná 26 seachtaine i seirbhís phoiblí inphinsin/státseirbhís inphinsin aige/aici.

Ceapachán tar éis scor den tSeirbhís Phoiblí de dheasca easláinte

1. I gcás go ndeachaigh duine ar scor ó chomhlacht seirbhíse poiblí, is féidir go mbeidh a p(h)insean de dheasca easláinte ón bhfostaíocht sin faoi réir athbhreithniú de réir na rialacha a bhaineann le scor de dheasca easláinte faoin scéim sin.
2. Má éiríonn le hiarratasóir, ceanglófar air/uirthi a dhearbhu ar a c(h)eapadh cé acu atá nó nach bhfuil sé/sí ag fáil pinsean seirbhíse poiblí (bíodh pinsean de dheasca easláinte nó pinsean eile ann) agus is féidir go mbeidh a p(h)insean seirbhíse poiblí faoi réir laghdú.
3. Tiocfaidh an t-iarratasóir chun bheith ina b(h)all den Scéim Pinsean Seirbhíse Poiblí Aonair ar a c(h)eapadh má bhí sos is mó ná 26 seachtaine i seirbhís phoiblí inphinsin/státseirbhís inphinsin aige/aici.

Tabhair faoi deara gur ar fáil [tríd an nasc seo](#) nó ar í a iarraidh ón tSeirbhís um Cheapacháin Phoiblí a bheidh faisnéis níos mine maidir leis na himpleachtaí pinsin dóibh sin atá ag fáil pinsean státseirbhíse nó seirbhíse poiblí de dheasca easláinte.

Fabhrú Pinsin

Beidh feidhm ag teorainn 40 bliain leis an tseirbhís iomlán is féidir a áireamh i gcomhair pinsin i gcás go raibh duine ina b(h)all de níos mó ná scéim pinsean seirbhíse poiblí amháin a bhí ann cheana (i.e., scéim nach í an Scéim Aonair í) de réir Acht 2012. Foráiltear don teorainn 40 bliain sin san Acht um Pinsin na Seirbhíse Poiblí (Scéim Aonair agus Forálacha Eile), 2012. Is féidir go mbeidh impleachtaí pinsin aige sin ar cheapaí ar bith a bhfuil cearta pinsin gnóthaithe aige/aici i bpost sa tseirbhís phoiblí roimhe seo.

Ranníocaíocht Bhreise Aoisliúntais

Tá an ceapachán seo faoi réir na Ranníocaíochta Breise Aoisliúntais de réir an Achta um Pá agus Pinsin Seirbhíse Poiblí, 2017. **Tabhair faoi deara:** Tá asbhaintí Ranníocaíochta Breise Aoisliúntais de bhreis ar aon ranníocaíochtaí pinsin (an phríomhscéim agus ranníocaíochtaí céilí agus leanaí) a éilítear faoi rialacha do scéime pinsean.

Chun tuilleadh faisnéise a fháil maidir leis an Scéim Pinsean Seirbhíse Poiblí Aonair, féach an suíomh Gréasáin seo a leanas – www.singlepensionscheme.gov.ie.

4. Uaireanta freastail

Socrófar uaireanta freastail ó am go chéile ach ní bheidh siad níos lú ná 41 uair agus 15 nóiméad mar uaireanta freastail comhlána sa tseachtain nó 35 huaire an chloig mar uaireanta freastail glana sa tseachtain. Beidh ar an iarrthóir rathúil uaireanta breise a dhéanamh ó am go ham, de réir mar a fhéadfaidh a bheith réasúnach agus riachtanach le haghaidh chomhlíonadh ceart a c(h)uid dualgas faoi réir na dteorainneacha a leagtar síos san Acht um Eagrú Ama Oibre, 1997. Cumhdaítear leis an ráta luach saothair is iníoctha aon dliteanas i leith freastail breise a eascróidh ó am go chéile.

Na hAchtanna um Dhífhhostú Éagórach, 1977 go 2015

Ní bheidh feidhm ag na hAchtanna um Dhífhhostú Éagórach, 1977 go 2015, maidir leis an bhfostaíocht seo a fhoirceannadh i gcás go rachaidh an Conradh Promhaidh seo in éag gan é a athnuachan agus ar an gcúis sin amháin.

An tAcht um Eagrú Ama Oibre, 1997

Beidh feidhm ag téarmaí an Achta um Eagrú Ama Oibre, 1997, maidir leis an bhfostaíocht seo, de réir mar is cuí.

Saoire Bhreioiteachta

Íocfar pá le linn neamhláithreacht bhreioiteachta chuí-dheimhnithe, de réir fhorálacha Scéim Saoire Breioiteachta na Seirbhíse Poiblí, 2018.

Beidh ar na ceapaithe sainordú a shíniú lena dtabharfar údarás don Roinn Coimirce Sóisialaí aon sochair atá dlite faoi na hAchtanna Leasa Shóisialaí a íoc go díreach leis an gCoimisiún um Athchóiriú an Dlí. Beidh íocaíocht le linn na breioiteachta faoi réir na héilimh riachtanacha a bheith á ndéanamh ag an gceapaí le haghaidh sochar árachais shóisialta don Roinn Coimirce Sóisialaí go díreach laistigh den teorainn riachtanach ama.

Saoire Bhliantúil

29 lá oibre sa bhliain a bheidh sa liúntas saoire bliantúla. Agus é faoi réir na ngnáthchoinníollacha maidir le saoire bhliantúil a dheonú, tá an liúntas sin bunaithe ar sheachtain cúig lá agus níl na gnáthlaethanta saoire poiblí ar áireamh ann.

Rúndacht, Caidreamh faoi Rún agus Caighdeáin Iompraíochta Rúndacht Oifigiúil agus Ionracas

I rith théarma an chonartha promhaidh, beidh oifigeach faoi réir fhorálacha an Achta um Rúin Oifigiúla, 1963, arna leasú ag an Acht um Shaoráil Faisnéise, 2014. Aontóidh an t-oifigeach nach nochtfaidh sé/sí aon fhaisnéis rúnda do thríú páirtithe neamhúdaraith le linn na tréimhse fostaíochta ná ina diaidh.

Cód Caighdeán agus Iompraíochta na Státseirbhíse

Beidh an ceapachán faoi réir Chód Caighdeán agus Iompraíochta na Státseirbhíse.

Gníomhaíocht Pholaitiúil

Beidh an ceapachán faoi réir na rialacha lena rialaítear státseirbhísigh agus polaitíocht.

An tAcht um Eitic in Oifigí Poiblí, 1995, agus an tAcht um Chaighdeán in Oifigí Poiblí, 2001

Tá feidhm ag forálacha na nAchtanna sin, de réir mar is cuí, maidir leis an bpost seo.

Cód Pearsanra

Tá na ciorcláin uile ar fáil ar an suíomh Gréasáin www.circulars.gov.ie

FÓGRA TÁBHACHTACH

Is iad sin thuas na príomhchoinníollacha seirbhíse agus níl sé beartaithe gur liosta cuimsitheach atá ann de na téarmaí agus de na coinníollacha fostaíochta ar fad a leagfar amach sa chonradh fostaíochta a chomhaontófar leis an iarrthóir rathúil.

PRÓISEAS AN CHOMÓRTAIS

Conas iarratas a dhéanamh

Ní mór iarratais a dhéanamh tríd an bhfoirm iarratais a chur isteach (féach thíos) agus ní mór na gnéithe seo a leanas a bheith ar áireamh iontu:

- Cálíochtaí Acadúla, Gairmiúla nó Teicniúla
- Stair Fostaíochta
- Ráiteas Pearsanta
- Príomhéachtaí

Má dhéantar aon mhíchruinneas le linn an fhoirm a chomhlánú, is féidir go ndiúltófar don iarratas. Dá bhrí sin, tá sé le do leas féin a chinntiú gur ceart atá an fhaisnéis a thugann tú sna codanna uile. Más gá leanúint ar aghaidh ar bhileog ar leith, leag an fhaisnéis amach ar an mbealach céanna atá sí leagtha amach san fhoirm iarratais.

Ní thugann cead isteach duine i gcomórtas, ná cuireadh chun agallaimh, le fios gur deimhin leis an gCoimisiún um Athchóiriú an Dlí go gcomhlíonann an duine lena mbaineann ceanglais an chomórtais ná nach bhfuil an duine dícháilithe de réir dlí ón bpost a shealbhú. Ní ghabhann aon ráthaíocht leis ach oiread go ndéanfar iarratas an iarratasóra a bhreithniú tuilleadh. Tá sé tábhachtach, dá bhrí sin, go dtugann tú faoi deara gur fútsa atá sé a chinntiú go gcomhlíonann tú na ceanglais incháilitheachta don chomórtas sula bhfreastalóidh tú ar agallamh. Más rud é nach gcomhlíonann tú na ceanglais bhunriachtanacha iontrála sin agus go bhfreastalaíonn tú ar agallamh ina ainneoin sin, beidh tú ag tabhú speansas gan ghá toisc nach mbeidh freagracht ar an gCoimisiún um Athchóiriú an Dlí as aon speansais arna dtabhú a aisíoc.

Is féidir an fhoirm iarratais a rochtain ar líne ag www.lawreform.ie.

Ba cheart iarratais a dhéanamh trí ríomhphost chuig recruitment@lawreform.ie

Dáta Deiridh:

Ní ghlacfar le hiarratais a bheidh faighte tar éis an dáta agus ama deiridh.

Ní mór an fhoirm iarratais chomhlánaithe a sheoladh le ríomhphost chuig recruitment@lawreform.ie tráth nach déanaí ná **meán lae an 9 Feabhra 2026**. Mura bhfaigheann tú admháil á dheimhniú go bhfuarthas d'fhoirm iarratais chomhlánaithe, déan teagmháil leis an bhfoireann Tacaíochta Dlí agus Corparáidí sa Choimisiún um Athchóiriú an Dlí ach glao a chur ar 01-6377600 (lcs@lawreform.ie)

Modhanna Roghnúcháin

De ghnáth, is mó an líon iarratas a fhaightear le haghaidh poist ná an líon a theastaíonn chun folúntais reatha agus folúntais amach anseo sa phost sin a líonadh. Fiú amháin i gcás go gcomhlíonfaidh tú ceanglais incháilitheachta an chomórtais, d'fhéadfadh an Coimisiún um Athchóiriú an Dlí a chinneadh nach ngairfí ach líon áirithe iarrthóirí chun agallaimh i gcás nach mbeadh sé praiticiúil agallamh a chur ar gach duine de bharr an lín atá ag déanamh iarratas ar an bpost. Chuige sin, bainfidh an Coimisiún um Athchóiriú an Dlí úsáid as próiseas gearrliostúcháin chun roghnú a dhéanamh ar ghrúpa daoine a mheasfar a bheith ar na daoine

is oiriúnaí don phost tar éis an fhoirm iarratais a scrúdú le haghaidh agallamh a chur orthu. Ní hé sin le rá nach bhfuil na hiarrthóirí eile oiriúnach ná nach bhfuil siad in ann an post a dhéanamh. Ina ionad sin, táthar á rá go meastar go bhfuil roinnt iarrthóirí ann a bhfuil cáilíochtaí níos fearr acu agus/nó a bhfuil taithí níos ábhartha acu, ar bhonn fianaise prima facie. Dá bhrí sin, tá sé le do leas féin cuntas mionsonraithe cruinn ar na cáilíochtaí/an taithí atá agat a chur ar fáil ar an bhfoirm iarratais.

Déanfaidh an Coimisiún Bord Measúnóirí a roghnú agus a cheapadh, agus áireofar na nithe seo leis na modhanna a úsáidfear chun an t-iarrthóir rathúil a roghnú le haghaidh an phoist seo:

- Iarrthóirí a ghearrliostú (más gá) ar bhonn na faisnéise atá ina bhfoirm iarratais;
- Agallamh iomaíoch agus cur i láthair gearr, má ghearrliostaítear é/í.

Samhlaítear go gcuirfear agallaimh ar siúl le linn na seachtaine dar tús an 16 Feabhra 2026.

Tuairisceoidh an Bord don Choimisiún agus déanfaidh sé moladh maidir leis an iarrthóir ba cheart a cheapadh.

Tá an dualgas ar na hiarratasóirí uile iad féin a chur ar fáil ar an dáta/na dátaí a bheidh sonraithe ag an gCoimisiún um Athchóiriú an Dlí agus cibé socruithe is gá a dhéanamh chun a chinntiú go bhfaighidh siad na teachtaireachtaí arna seoladh chucu ag na sonraí teagmhála arna sonrú ar a bhfoirm iarratais (is é ríomhphost an meán cumarsáide is fearr linn, ach is féidir an gnáthphost a úsáid nuair a mheastar é a bheith cuí). Ní bheidh an Coimisiún um Athchóiriú an Dlí freagrach as aon speansais a thabhoídís iarrthóirí i ndáil lena n-iarrthóireacht.

Rúndacht

Faoi réir fhorálacha an Achta um Shaoráil Faisnéise 2014, caithfear le hiarratais i modh rúin dhaingin.

Imréiteach Slándála

Iarrfar grinnfhiosrúchán an Gharda Síochána i gcás daoine aonair atá á mbreithniú lena gceapadh. Ceanglófar ar an iarratasóir foirm Ghrinnfhiosrúcháin an Gharda Síochána a chomhlánú agus a sheoladh ar ais. Cuirfear an fhoirm ar aghaidh chuig an nGarda Síochána le haghaidh seiceálacha slándála ar gach seoladh in Éirinn agus i dTuaisceart Éireann inar chónaigh an t-iarratasóir roimhe seo. Chomh maith leis, féadfar fiosrúcháin a dhéanamh leis an bhfórsa póilíneachta in aon tír inar chónaigh an t-iarratasóir roimhe seo. Mura n-éiríonn leis an iarratasóir ina leith sin, scriosfaidh an Coimisiún um Athchóiriú an Dlí an fhaisnéis lena mbaineann. Má tharlaíonn sé ina dhiaidh sin go bhfuil an t-iarratasóir á b(h)reithniú lena c(h)eapadh chuig post eile, ceanglófar air/uirthi an fhaisnéis sin a sholáthar an athuair.

Ceartha Iarrthóirí

Treoirínte maidir le déileáil le hachomhairc/iarratais ar athbhreithniú

Breithneoidh an Coimisiún um Athchóiriú an Dlí iarrataí ar athbhreithniú de réir fhorálacha na gcód cleachtais arna bhfoilsíú ag an gCoimisiún um Cheapacháin Seirbhíse Poiblí agus a dtagraítear dóibh sa bhileog mhínithe i dtosach an leabhráin seo. Tá na Cóid Chleachtais ar fáil ar shuíomh Gréasáin [an Choimisiúin um Cheapacháin Seirbhíse Poiblí](http://www.cpsa.ie) (www.cpsa.ie).

I gcás go mbeidh iarrthóir míshásta le gníomh nó cinneadh a rinneadh i dtaca lena (h)iarratas, féadfaidh sé/sí athbhreithniú a iarraidh faoi Chuid 7 den chód cleachtais lena rialaítear an próiseas earcaíochta, ar athbhreithniú é a mbeidh duine sa chomhlacht is earcaitheoir (athbhreithnitheoir tosaigh) ina bhun: I gcás go mbeidh iarrthóir míshásta fós tar éis an athbhreithnithe tosaigh sin, féadfaidh sé/sí a iarraidh go ndéanfaidh “eadránaí cinntí” scrúdú ar sheoladh an athbhreithnithe tosaigh.

Mar mhalairt ar a bhfuil thuas, is féidir le hiarrthóir féachaint leis an ábhar a réiteach ar bhonn neamhfhoirmiúil mar atá leagtha amach thíos. I gcás go mbeidh iarrthóir míshásta fós tar éis aon phlé den sórt sin, is féidir leis/léi athbhreithniú foirmiúil a iarraidh.

Próiseas neamhfhoirmiúil

- Féadfaidh an t-iarrthóir leas a bhaint as an athbhreithniú foirmiúil laistigh de chúig lá oibre ón tráth a fhaightear fógra faoin gcinneadh tosaigh agus ba cheart an t-athbhreithniú a thionól de ghnáth idir an t-iarrthóir agus an duine a chuir an cinneadh in iúl (nó an duine iomchuí).
- I gcás go mbainfidh an cinneadh atá á chur in iúl le céim eatramhach de phróiseas roghnúcháin, ní mór an iarraidh ar athbhreithniú neamhfhoirmiúil a fháil laistigh de dhá lá oibre ón tráth a fhaightear an cinneadh.
- I gcás go mbeidh iarrthóir míshásta fós tar éis aon phlé neamhfhoirmiúil den sórt sin, féadfaidh sé/sí dul i mbun na nósanna imeachta foirmiúla atá leagtha amach thíos.
- Más mian leis an iarrthóir go ndéileálfar leis an ábhar ar mhodh athbhreithniú foirmiúil, ní mór dó/di é sin a iarraidh laistigh de dhá lá oibre ón tráth a fhaightear an fógra faoi thoradh an athbhreithnithe neamhfhoirmiúil.

Próiseas Foirmiúil: Athbhreithniú inmheánach

- Ní mór don iarrthóir a (h)ábhair mhíshástachta i ndáil leis an bpróiseas a chur in iúl i scríbhinn don Cheann Riaracháin, an Coimisiún um Athchóiriú an Dlí, agus na gnéithe sin den ghníomh nó den chinneadh i ndáil lena (h)iarrthóireacht ar mian leis/léi iad a chur faoi athbhreithniú á leagan amach aige/aici.
- Ní mór iarraidh ar athbhreithniú a dhéanamh laistigh de dheich lá oibre ón tráth a fhaightear an fógra faoin gcinneadh tosaigh. I gcás go mbainfidh an cinneadh le céim eatramhach de phróiseas roghnúcháin, ní mór an iarraidh ar athbhreithniú a fháil laistigh de cheithre lá oibre.
- Ní cheadófar na teorainneacha ama sin a fhadú ach amháin in imthosca den chineál is eisceachtúla agus is faoi rogha aonair an Choimisinéara Lánaimseartha nó aon Oifigigh Ainmnithe eile laistigh den Choimisiún a bheidh sé fadú a cheadú.
- De ghnáth, ní mór an toradh a chur in iúl don iarrthóir laistigh de 20 lá oibre ón tráth a fhaightear an gearán nó an iarraidh ar athbhreithniú. Gheobhaidh an t-iarrthóir toradh an athbhreithnithe ar mhodh tuarascáil i scríbhinn.

- Más rud é go bhfuil iarrthóir míshásta le toradh an athbhreithnithe tosaigh, féadfaidh sé/sí a iarraidh go ndéanfaidh eadránaí cinntí athbhreithniú ar sheoladh an athbhreithnithe tosaigh.

Athbhreithniú ag an eadránaí cinntí

Is é Uachtarán an Choimisiúin um Athchóiriú an Dlí, nó an Coimisinéir Páirtaimseartha is sinsearaí, a cheapann an t-eadránaí cinntí. Ní bheidh aon bhaint ag an eadránaí cinntí leis an bpróiseas roghnúcháin agus déanfaidh sé/sí breith a thabhairt faoi iarrataí ar athbhreithniú i gcásanna ina bhfuil iarrthóir míshásta le toradh an athbhreithnithe tosaigh. Is cinneadh críochnaitheach a bheidh i gcinneadh an eadránaí cinntí i ndáil le hábhair den sórt sin.

- Ní mór iarraidh a dhéantar chuig an eadránaí cinntí a fháil laistigh de sheacht lá oibre ón tráth a thugtar fógra faoi thoradh an athbhreithnithe tosaigh.
- Ní mór toradh an imscrúdaithe a chur in iúl don iarrthóir i bhfoirm tuarascála i scríbhinn laistigh de 10 lá oibre.

I gcás go mbeidh iarrthóir den tuairim gur sáraíodh an Cód Cleachtais ón gCoimisiún um Cheapacháin Seirbhíse Poiblí i ngné den phróiseas, féadfaidh sé/sí a éileamh go n-imscrúdófaí é faoi **Chuid 8** den chód cleachtais (cpsa@cpsa.ie)

Próiseas neamhfhoirmiúil

- Molann an Coimisiún um Cheapacháin Seirbhíse Poiblí go mbainfeadh an t-iarrthóir leas as an bpróiseas neamhfhoirmiúil chun féachaint leis an ábhar a réiteach leis an gcomhlacht is earcaitheoir. Más rud é go bhfuil an t-iarrthóir míshásta fós, féadfaidh sé/sí dul i muinín an phróisis fhoirmiúil laistigh de dhá lá oibre ó fhógra faoin bpróiseas foirmiúil a fháil.

Próiseas foirmiúil

- Má tá athbhreithniú foirmiúil á iarraidh agat, ní mór duit scríobh chuig an gCoimisinéir Lánaimeartha nó chuig Oifigeach Ainmnithe eile laistigh den Choimisiún, agus mionsonraí á dtabhairt agat faoin sárú ar an gcód cleachtais agus aon doiciméid ábhartha a d'fhéadfadh tacú leis an líomhain á gcur faoi iamh agat.
- De ghnáth, ní mór an toradh a chur in iúl don iarrthóir laistigh de 20 lá oibre ón tráth a fhaightear an gearán nó an iarraidh ar athbhreithniú. I gcás nach dtiocfar ar chinneadh laistigh den tréimhse sin, déanfaidh an t-athbhreithnitheoir an t-iarrthóir a choinneáil ar an eolas faoi stádas an athbhreithnithe.
- Más rud é go bhfuil iarrthóir míshásta le toradh an athbhreithnithe sin, féadfaidh sé/sí athbhreithniú breise a iarraidh tríd an ábhar a tharchur chuig an gCoimisiún um Cheapacháin Seirbhíse Poiblí i riocht achomharc i gcoinne athbhreithniú an tsealbhóra ceadúnais. Ní mór dó/di scríobh chuig an gCoimisiún um Cheapacháin Seirbhíse Poiblí laistigh de dheich lá oibre ón toradh ar athbhreithniú an tsealbhóra ceadúnais a fháil.

Oibleagáidí iarrthóirí

Ba cheart d'iarrthóirí a thabhairt faoi deara go ndícháileofaí iad dá dtabharfadh siad faoi chanbhasáil agus nach mbeadh siad curtha san áireamh sa phróiseas dá bharr.

Ní ceadmhach d'iarrthóirí:

- faisnéis bhréagach a chur ar fáil go feasach nó go místuama
- aon duine a chanbhasáil, trí aslú nó gan aslú
- cur isteach ar an bpróiseas nó cur as dó ar bhealach ar bith.

Ní ceadmhach do thríú páirtí iarrthóir a phearsanú ag céim ar bith den phróiseas. Aon duine a sháraíonn na forálacha thuas nó a chabhraíonn le duine eile na forálacha thuas a shárú, is féidir go mbeidh sé/sí ciontach i gcion.

Ina theannta sin, i gcás go raibh nó go bhfuil duine a ciontaíodh i gcion ina (h)iarrthóir ag próiseas earcaíochta, ansin:

- i gcás nár ceapadh é/í chuig post, dícháileofar é/í mar iarrthóir; agus
- i gcás gur ceapadh é/í tar éis an phróisis earcaíochta atá i gceist, forghéillfidh sé/sí an ceapachán sin.

Iarrthóireacht a mheas a bheith tarraingthe siar

Glacfar leis go bhfuil a (h)iarrthóireacht tarraingthe siar ag iarrthóir nach bhfreastalaíonn ar agallamh nó ar aon tástáil eile de réir mar a éileoidh an Coimisiún um Athchóiriú an Dlí nó nach soláthraíonn, má iarrtar a leithéid air/uirthi, cibé fianaise a éilíonn an Coimisiún um Athchóiriú an Dlí i dtaca le hábhar ar bith a bhaineann lena (h)iarrthóireacht.

Seirbhís ardchaighdeán do chustaiméirí

Tá sé mar aidhm againn scothsheirbhís ar ardchaighdeán a chur ar fáil dár gcustaiméirí ar fad. Más rud é go bhfuil tú míshásta le gné ar bith den tseirbhís a fhaigheann tú uainn ar cibé cúis, mholfaimis duit aird an aonaid nó an bhaill foirne lena mbaineann a tharraingt ar an méid sin. Is rud tábhachtach é sin mar go gcinntíonn sé go bhfuilimid eolach ar an bhfadhb agus go bhfuilimid in ann na bearta cuí a dhéanamh lena réiteach.

Na hAchtanna um Chosaint Sonraí, 1988 agus 2018

Nuair a fhaightear an fhoirm iarratais uait, cruthaímid taifead ríomhaire faoi d'ainm agus cuirtear cuid mhór den fhaisnéis phearsanta a sholáthraíonn tú isteach sa taifead sin. Úsáidtear an taifead pearsanta sin chun d'iarrthóireacht a phróiseáil agus chuige sin amháin. Tá faisnéis atá á coinneáil ar ríomhaire faoi réir na gceart agus na n-oibleagáidí a leagtar amach sna hAchtanna um Chosaint Sonraí, 1988 agus 2018. Faoi na hAchtanna sin, tá tú i dteideal teacht tráth ar bith ar chóip den fhaisnéis atá á coinneáil fút ar ríomhaire. Gearrann an Coimisiún um Athchóiriú an Dlí táille €6.35 as gach iarraidh. Ba cheart duit seic nó ordú poist a chur faoi iamh agus d'iarraidh a sheoladh chuig:

Ceann Riaracháin,

Coimisiún um Athchóiriú an Dlí,

Teach Styne,

Sráid Haiste,

Baile Átha Cliath 2.

Déantar míreanna áirithe faisnéise, nach mbaineann go sonrach le haon duine aonair, a bhaint as taifid ríomhaire chun críocha ginearálta staidrimh.

Tabhair faoi deara: Is mar eolas amháin atá an doiciméad seo, agus níl sé beartaithe a bheith ina léiriú dlíthiúil ar aon doiciméid, treoirlínte nó reachtaíocht eile.

Aguisín 1

Príomhinniúlachtaí – Leibhéal an Ardoifigh Feidhmiúcháin



Ceannaireacht Foirne

- Oibríonn sé/sí leis an bhfoireann chun ardfheidhmíocht a éascú, agus cuspóirí soiléire inghnóthaithe á bhforbairt agus aghaidh á tabhairt ar aon saincheistanna feidhmíochta má thagann siad chun cinn
- Soláthraíonn sé/sí faisnéis agus comhairle shoiléir ar ar gá don fhoireann a dhéanamh
- Féachann sé/sí le modhanna éifeachtacha oibre a fhorbairt agus a chur chun feidhme chun cuspóirí a chomhlíonadh
- Treoraíonn sé/sí an fhoireann le dea-shampla, agus é/í ag cóitseáil daoine aonair agus ag tacú leo de réir mar is gá
- Cuireann sé/sí an-tábhacht ar fhorbairt foirne, ar oiliúint agus ar scileanna agus acmhainn na foirne a uasmhéadú.
- Tá sé/sí solúbtha agus toilteanach oiriúnú, agus é/í ag rannchuidiú go dearfach le hathruithe a chur chun feidhme

Breithiúnas, Anailís agus Cinnteoireacht

- Bailíonn agus anailísíonn sé/sí faisnéis ó fhoinsí ábhartha, cibé acu is foinsí airgeadais, foinsí uimhriúla nó foinsí eile iad, agus raon tosaí criticiúla á gcur sa mheá aige/aici
- Cuireann sé/sí aon saincheistanna leathana, cláir oibre, íogaireachtaí agus impleachtaí gaolmhara san áireamh agus cinntí á ndéanamh aige/aici.
- Úsáideann sé/sí eolas agus taithí roimhe chun cinntí a threorú

- Baineann sé/sí úsáid as breithiúnas chun cinntí fónta a bhfuil dea-réasúnaíocht taobh thiar díobh a dhéanamh agus seasann sé/sí dóibh siúd.
- Molann sé/sí réitigh chun aghaidh a thabhairt ar fhadhbanna

Bainistíocht agus Soláthar Torthaí

- Glacann sé/sí freagracht agus cuntasacht as cuspóirí comhaontaithe a sholáthar
- Éiríonn leis/léi raon tionscadal difriúil agus gníomhaíochtaí difriúla oibre a bhainistiú ag an aon am amháin
- Déanann sé/sí a (h)obair féin agus obair daoine eile a struchtúru agus a eagrú go héifeachtach
- Tá sé/sí loighciúil agus pragmatach ó thaobh cur chuige de, agus na torthaí is fearr is féidir a sholáthar aige/aici laistigh de na hacmhainní atá ar fáil
- Tarmligeann sé/sí obair go héifeachtach, agus faisnéis agus fianaise shoiléir á sholáthar aige/aici ar ar gá a dhéanamh
- Sainaithníonn sé/sí go réamhghníomhach réimsí lena bhfeabhsú agus cumann sé/sí moltaí praiticiúla maidir lena gcur chun feidhme
- Léiríonn sé/sí díograis d'fhorbairtí nua/cleachtais athraitheacha oibre agus féachann sé/sí leis na hathruithe sin a chur chun feidhme go héifeachtach
- Cuireann sé/sí córais/próisis chuí i bhfeidhm chun seiceáil cháilíochta gach gníomhaíochta agus aschuir a chumasú
- Déanann sé/sí cleachtadh agus cur chun cinn ar dhírú láidir ar sheirbhís ardchaighdeán do chustaiméirí a sholáthar do chustaiméirí inmheánacha agus do chustaiméirí seachtracha araon

Scileanna Idirphearsanta agus Cumarsáide

- Déanann sé/sí teagmháil a fhorbairt agus a choinneáil ar bun le comhghleacaithe agus le geallsealbhóirí eile chun cabhrú leis an ról a chomhlíonadh
- Gníomhaíonn sé/sí mar nasc éifeachtach idir an fhoireann agus an lucht ardbhainistíochta
- Spreagann sé/sí plé oscailte cuiditheach ar shaincheistean oibre
- Léiríonn sé/sí cinnteacht, agus é/í ag gnóthú glacadh lena c(h)inntí trí fhaisnéis ábhartha a leagan amach agus trí na buntáistí a chur in iúl
- Caitheann sé/sí le daoine eile go stuama, go tuisceanach, go cúirtéiseach agus go hómósach, fiú i gcúinsí dúshlánacha
- Cuireann sé/sí faisnéis i láthair go soiléir, go gonta agus go muiníneach agus cumarsáid ó bhéal agus i scríbhinn á déanamh aige/aici
- Comhoibríonn sé/sí agus tacaíonn sé/sí le comhghleacaithe spriocanna na heagraíochta a bhaint amach

Saineolas, Oilteacht agus Féinfhorbairt

- Tá tuiscint shoiléir aige/aici ar a ról, a c(h)uspóirí agus a spriocanna féin agus ar ról, cuspóirí agus spriocanna na foirne agus ar conas a thagann siad le hobair an aonaid agus na Roinne/na hEagraíochta agus cuireann sé/sí an tuiscint sin in iúl do dhaoine eile.
- Tá ardleibhéal saineolais agus eolas leathan Earnála Poiblí atá ábhartha dá réimse oibre aige/aici
- Díríonn sé/sí ar fhéinfhorbairt, ag déanamh a d(h)íchill a f(h)eidhmíocht a fheabhsú

Treallús agus Tiomantas do Luachanna Seirbhíse Poiblí

- Déanann sé/sí a d(h)ícheall feidhmíocht ardleibhéil a bhaint amach, agus méid suntasach fuinnimh á chur isteach aige/aici chun cuspóirí comhaontaithe a bhaint amach
- Léiríonn sé/sí athléimneacht agus é/í ag déileáil le himthosca dúshlánacha agus le hardéilimh
- Is duine iontaofa é/í agus is féidir brath air/uirthi
- Cinntíonn sé/sí go ndírítear ar chustaiméirí sna seirbhísí go léir a chuirtear ar fáil
- Cloíonn sé/sí le hardchaighdeáin ionracais, eitice agus mhacántachta